

Gvangjsih Minzcuz Bau

ganbbau: CN45-0036 B.2014 Nd.7 Ng.23 liggaueq gyapngux nienz ndwenloeg ngeihcaet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3133期

Cungzcoj Si Gawjbanh Sawcuengh Beizyinbanh

崇左市举办壮语文专业知识培训班

Bineix, Cungzcoj Si dwg aen si sawqdiemj guh Gvangjsih Vahcuengh Sawcuengh Suijbingz Gaujsi ndeu. Vih hawj doenghboux gaujswng daezsang Sawcuengh cihsiz suijsingz nem gaujsi naengzlig, 7 nyied 10 daengz 12 hauh, Cungzcoj Si Minzvej, Minzyijvej youq Cungzcoj Siveij Dangjau gawjbanh 2014 nienz Cungzcoj Si Sawcuengh cihsiz beizyinbanh, cingj doengh-

boux lauxhangz Sawcuengh daj Swcigih Minzyijvej, Gvangjsih Sawcuengh Yozyau, Gvangjsih Sam Nyied Sam Caczise daeuj hwnjdangz. Daengx si daihgaiq gungh miz 100 vunz daeuj camgya 3 ngoenz beizyin neix, gyoengqde dwg doenghboux bauqmingz camgya Vahcuengh Sawcuengh Suijbingz Gaujsi, yezvu guzgan gak yienh(si, gih) minzyijban(giz), daengxcungq

gan- bu si minzyijvej.

Baez neix beizyin neiyungz dwg gangj gij cingzgvang guek raeuz fazcanj vah saw minzcuz nem gij hong vah saw minzcuz gih raeuz, son Sawcuengh gihcuq cihsiz caeuj gangj gij saeh aeu haeujsim gvendaengz Vahcuengh Sawcuengh Suijbingz Gaujsi daengj.

(Dwng Haijcouh/邓海周 Liuz Ginh/刘军)

Lungzswng: Ngoenzciet "Ngaiz Bak Ranz" Vunz Cien Vunz Fanh

龙胜：“百家宴”盛况空前



7 nyied 20 hauh, youq Lungzswng Gak Cuz Swciyen Loz-gyangh Yangh Dilingz Mbanjdungcuz gwnz gvangjancz henz giuz-ndojfwn gyaeujmbanj de, vunzlai comz gvaq ngoenzciet Duncuz daj ciuhgeq daeuj bi bi gvaq de heuhguh "ngaiz bak ranz", baez ciet neix banh ndaej gig hung. Gyoengq beixnuengx gak minzcuz ndaw guek, mizdi hekyouz rog guek caeuj beixnuengx Duncuz dangdieg daengj gungh gyawj fanh vunz, doengzcaez angqyangz gvaq ngoenzciet neix. Ndaw doz dwg vunz Duncuz youq gwnz daizheiq naj laeuzgyong de yienj boq venz caijdangz.

(Yungz Vei/荣辉 Mungz Cwngcangz/蒙政娣 ingj)

Mungzsanh Yen Comz Rengz Guh Hong Yanghging Yauzcuz Yangh

蒙山县合力推进瑶族乡乡庆工作

Bineix, bilaeng, Mungzsanh Yen Cangzbingz Yauzcuz Yangh, Yayiz Yauzcuz Yangh faenbied laebbaenz 30 hopbi. Vih guh ndei yanghging, Mungzsanh Yen Minzcuzgiz dawz gij hong bwh guh yanghging de dangguh bineix yiengh hong naek ndeu, comz rengz doihaeuj hong bwh yanghging song aen yangh Yauzcuz neix.

It dwg candei cujiz lingjauj,

cienzmienh anbaiz. Aen yienh neix youq bi' gvaq 6 nyied laeb le lingjauj siujcuq, neix hawj ndaw yangh guh ndei yanghging daezhawj cujiz baujcaeng gig miz rengz. Ngeih dwg dawz fangh-an guh ndaej gig sijsaeq, dingh ndei cawjdaez, faen hong daengz giz, gak boux gag guh ndei hong bonjfaenh. Sam dwg ca doiq cungdenj guh senhconz. Seiq dwg caen rengz guh

hanghmoeg. Aen yienh neix gungh cingjeix ok yanghging hanghmoeg 24 aen, gungh roengzngaenz 6530 fanh maenz.

Dangqnaj, gaenq miz 9 aen hanghmoeg guh sat lo, gij hanghmoeg wnq ne cienzngaenz cingq laebdaeb roengz daengz caemhcaiq haigoeng lo.

(Yauz Vanlingz/姚焕玲 Luz Yungjfangh/陆永芳)

SIUSIK DINJ

简讯

● Gaenh bi daeuj, Yungzsuij Myauzcuz Swciyen doenggvaq lai cungj banhfap, sonyinx vunzmbanj sawq ndaem gij makit maenhndei bi sou song miuz de 500 lai moux, moux ndaej 3000 lai goenggaen, dan yiengh neix moux souhaeuj 3 fanh lai maenz, baenz le aen canjyez daeuz dazyinx nungzminz laisou baenzfouq.

(Lungz Linzci)

● Bi' gvaq 6 nyied daengz bineix 6 nyied, Duh'anh Yauzcuz Swciyen gungh roengzngaenz 14.3 ik maenz guh gij hanghmoeg yienhgingq youqgaenj, saedhengz guh roen lajmbanj, haifat daegsaek lijyouz canjyez daengj 45 aen hanghmoeg yienhgingq youqgaenj, guh sat yinvu 16%.

(Lanz Fuzgvanh Veiz Ganliuz)

● Vih hawj nungzminz gyalai souhaeuj, guh hung guh ak daegsaek canjyez, 7 nyied 16 hauh, Gunghcwngz Yauzcuz Swciyen Fuzbinzban cujiz lauxhangz youq Gvanhyinh Yangh gawjbanh noufaexcuk dajciengx gisuz beiz-yinbanh, dap aen bingzdaiz hawj nungzminz "doxson, doxcoengh, doxdaiq", aen yangh neix 50 lai hohdajciengx camgya beizyin.

(Cwng Ciminj)

● Bineix, Lozcwngz Mulajcuz Swciyen laebbaenz 30 hopbi, vih engq ndei baijok gij doenghyiengh nem yienghsiengq maenhndei caeuj gij vwnzva minzcuz mbanj-ranz Mulajcuz, 7 nyied 16 hauh, ben senhconz lijyouz heuhguh 《Mulauj Geizheih Lozcwngz Gyaundeih》youq Siujcangzanh Cin Sanghhoz Cunh cingqsik ingjuh lo, ben neix baijok gij yienghsiengq lijyouz mbanjranz Mulajcuz, hawj ndawbiengz lai rox Lozcwngz, vih yienhgingq 30 hopbi soengqlaex.

(Mungz Cwngshwh)

● Daj 2014 nienz daeuj, Bingzgoj Yen gungh gawjbanh gak loih nungzyez gohgi beizyinbanh 212 geiz, cungdenj son saujsu minzcuz nungzminz hag gohyoz vwnzva cihsiz, beizyangj bouxdaeuz sifan baengh gohgi baenzfouq; soengq 0.3 fanh bonj saw gohgi hawj nungzminz.

(Vuz Anhgingh)